



班長

我踮政治大學邊仔十八冬矣，遐影印店誠濟間，據在我揀，毋過後來我攏慣勢去勞煩「影印班長」。班長的名號，毋是清彩就有，愛跤手緊，嘛愛成品嬭才會使。有當時仔歇睏日，人客趕緊欲印，敲電話予伊，嘛會專工加班。班長逐工笑頭笑面，穿甲 pháh-lih-pháh-lih，個某，逐家叫伊副班長，人嬭閣古錐。翁生某旦，佇店裡無閒的形影，袂輸文藝電影的男女主角啦！

交關久熟矣，就會恰個話仙。我問講「班長」的名號佢位來的。伊講人客叫久就牢咧。這予我想著「班長」這個詞有幾若款講法。來源是阿兵哥的士官班長，無就是規班學生囡仔的班頭、班代表，嘛有可能是組織內底耒頭、上厲害的人。好歹代攏有班長，像「惹街班長」、「食冰班長」、「卡拉 ok 班長」、「抓耙仔班長」……。總講一句，愛誠拍拚，才有夠格做「班長」。

我嘛是拚足久才做「班長」。佇早前重男輕女的時代，小學六冬、國中三冬，攏總十八學期，阮班的班長攏是查埔的，就是輪袂著我。等到讀高雄女中，人笑講是尼姑學校，無查埔的，班長著愛查某囡仔做，我毋才有機會通做班長。誠好運佇畢業進前做班長，照理講畢業了愛耒頭辦同窗會才著。毋過，嫁傷遠，飼囡仔，無閒教冊，同學就若斷線的風吹。兩冬前我起鼓佇『line』成立群組，共四散的同學拚倚來，才發現彼陣十八歲的查某囡仔，經過三十冬的拍拚，這馬逐家攏有一片天。

查某人欠的是機會，所以我誠鼓勵阮查某囡做班長替同學服務，才有成長的機會。大漢查某囡種(tsing)著我的家婆性，好笑神、有耐性閣毋驚艱苦，嘛佇查某學校北一女中做班長。細漢查某囡讀美術班，有藝術家的個性，講逐項「長」都欲共做一擺才有趣味，無論是威風凜凜的班長、抑是氣質溫馴的副班長，甚至是文質彬彬的學藝股長、走拋拋的服務股長，看伊做甲攏誠趣味。伊閣討欲做「所長」，講做過班長的人共便所摒甲清清氣氣，就無人敢閣嬌滴滴。聽著誠有意義，「所長」的奉獻恰班長有地比喔！

作者：王秀容

☆詞彙學習☆

【據在】kì/kù-tsāi：任由、任憑。

【專工】tsuan-kang：特地、專程。

【交關】kau-kuan：買賣、惠顧。

【話仙】uē-sian：閒聊。

【起鼓】khí-kóo：揭開序幕。

【嬌滴滴】kiau-tih-tih：嬌生慣養。

《臺灣閩南語常用詞辭典》<http://twblg.dict.edu.tw>